

元始天尊说十一曜大消灾神咒经

元始天尊說十一曜大消灾神咒經

淨心神咒

太上臺星應變無停
驅邪縛魅保命護身

智慧明靜心神安寧
三魂永久魄無喪侵

淨口神咒

丹朱口神吐穢除氛
舌神真倫通命養神

羅千齒神驅邪衛真
喉神虎賁氣神引津

心神丹元 令我通真 思神念液 道炁長存
淨身神咒

靈寶天尊 安慰身形 弟子魂魄 五臟玄冥
青龍白虎 隊仗紛紜 朱雀玄武 侍衛我真

安土地咒

原始安鎮 普告萬靈 岳瀆真官 土地祇靈

左社右稷 不得妄驚 回向正道 內外澄清

各安方位鎮守壇庭
太上有命搜捕邪精
護法神王保衛誦經
皈依大道元亨利貞
淨天地神咒

天地自然穢氣分散
洞中玄虛晃朗太玄

八方威神使我自然
靈寶符命普告九天

乾羅怛那洞罡太玄
斬妖縛邪殺鬼萬千

中山神咒元始玉文
持誦一遍却病延年

按行五岳 八海知聞 魔王束首 侍衛我軒
凶穢消散 道炁長存

祝香咒

道由心學 心假香傳 香焚玉爐 心存帝前

真靈下盼 仙佩臨軒 令臣關告 逕達九天

金光神咒

天地玄宗 萬氣本根 廣修浩劫 證吾神通

三界內外惟道獨尊
體有金光覆映吾身

視之不見聽之不聞
包羅天地養育群生

誦持萬遍身有光明
三界侍衛五帝司迎

萬神朝禮役使雷霆
鬼妖喪膽精怪忘形

內有霹靂雷神隱名
洞慧交徹五炁騰騰

金光速現覆護真人

開經偈

寂寂至無宗 虛峙劫仞阿 豁羅洞玄文

誰測此幽遐 一入大乘路 孰計年劫多

不生亦不滅 欲生因蓮花 超凌三界途

慈心解世羅 真人無上德 世世爲仙家

爾時

元始天尊在大羅天上 玉京山中 騫林樹下

鳴大法鼓扣大法鐘 普集十方三界諸天諸地

日月星宿一切聖衆爲說過去未來一切衆生
善惡報應灾福因緣時于座中有一真人

名曰青羅即于座起瞻仰尊顏稽首再拜

長跪而言弟子夙生慶幸得遇人天伏遇天尊

大慈設大法橋廣爲衆生說諸因緣令得開悟

普入法門臣今下觀欲界衆生以何因緣

四時之中橫遭刑獄一生之內疾病纏綿或分

野州縣 水火災荒 兵戈競起 疫疾流行 臣今

未悟 幸望天尊特開慈憫 以釋愚蒙 天尊隱

幾而言 奇哉 青羅能爲衆生問諸緣業 切以欲

界衆生 輪回生死 沈溺愛河 唯務貪生 不修

正道 不知有五行推運 十一曜照臨 主其灾福

至如土火留伏 金木凌犯 羅計勃逆 日月薄蝕

致以州縣播遷 人民灾難 水火蟲蝗 刀兵相犯

悉皆由也凡以衆生托蔭爲人皆稟陰陽造化
或貴或賤或富或貧定分雖殊灾福一矣至如
帝王國主后妃臣僚系于紫微垣中各有品位
五岳四瀆乃如分野一切人民屬于日月五星臨
照吾今示汝下觀星鬥看其行度如有五星不順
凌犯宮宿照臨帝土及諸分野灾難競起疫毒
流行兆民死傷速令塑繪十一曜形儀于清淨

處建立道場嚴備香花燈燭請命道士或自持
念十一曜大消灾神咒經一七日二七日

或三七日修齋行道禮念懺悔即得上消天灾
保鎮帝土下禳毒害以度兆民汝宜聽信

轉轉教人受持讀誦青羅真人叩頭再拜

上告天尊伏願大慈廣爲宣說

是時

天尊即說十一曜大消灾神咒九星都咒

九曜順行 元始徘徊 華精瑩明 元靈散開

流盼無窮 降我光輝 上投朱景 解滯豁懷

得馭飛霞 騰身紫微 人間萬事 令我先知

五星神咒

五星列照 煥明五方 水星却灾 木德致昌

熒惑消禍 太白闢兵 鎮星四據 家國利亨

名刊玉簡 字錄帝房 乘飈扇景 飛騰太空
出入冥無 游宴十方 五雲覆蓋 招神攝風
役使萬靈 上衛仙翁

太陽真君神咒

東望扶桑宮 稽首朝郁儀 太陽洞明景

寥寥何所思 令我拜金色 候天望英姿

皇華將玉女 臨軒降此時

太陰真君神咒

仰望顧八表 惟月孕陰精 中有太素皇

夫人駕綠輶 耀華光二極 混明照三清

殷懃求至道 五色下來迎

木星真君神咒

歲星乘木德 展轉耀東鄉 凌天姿潤澤

正色混明皇 尋花歌浩漭 擲水咏芝房

經時頻禱祝獲福自然長

火星真君神咒

芒角森龍鳳威光叱十方丹罡耀五夜

朱火焰三邊晶明符正炁劍戟煥兵權

攬搶應滅迹孛彗敢當前

金星真君神咒

太白凌清漢騰霜耀素英亭亭浮瑞彩

皎皎盛長庚 鋒高能禦寇 色潤每降兵

推窮符歷數 合道與長生

水星真君神咒

妙哉符五炁 仿佛見辰門 嵯峨當丑位

壬癸洞靈君 分輝凝皎潔 盼嚮赴思存

仙歌將舞蹈 良久下金天

土星真君神咒

高穹符戍己 藏陸起重霄 五行尊暗耀

九土見光昭 甘石推留伏 陶巫算沆寥

上仙垂雨露 伏地禮空搖

羅睺真君神咒

神首循黑道 冥冥超至靈 暗明期朔望

陽德晦陰精 高鎮黃旛闕 矛戟耀霜鈴

志心俟多福 稽首諷真經

計都真君神咒

處暗表陰德 豹尾鎮星宮 怒指摧山岳

權雄暝太空 龍蛇生怪狀 變異忽昏朦

主人長壽福 禳應在恪恭

紫炁真君神咒

授制宗元帝 含精耀紫微 陰陽乘運極

幽顯闔靈機 玉輿登廣漠 金鈴步鬥飛

四宿循周度 九土尊天威

月孛真君神咒

太陰光玉緯 精魄育群生 青桂黃華輔

郁羅保素靈 毛頭分怪狀 彗尾或潛經

舍次流灾福 齋修洞杳冥

三啓頌

妙哉三洞響 寥寥何鈴鈴 尋聲若無有

運之不見形 響音洞十方 聽之不聞聲

又

大道須人弘 游心歸太空 朝禮運十方

又
升度乘九龍 飄飄超三界 亦由雲中崇

吾師天中尊 超超無上皇 仰觀地維表

彷彿紫炎堂 巍峨玄都室 但見仙人房

天尊告青羅真人曰此諸神咒若能虔心諷誦
即得星辰順度疾病消除社稷安寧人民道泰
青羅真人稽首再拜及諸仙衆聞說經咒

皆大歡喜作禮而退于是青羅真人下傳世間
推窮歷數信受奉行

元始天尊說十一曜大消灾神咒經



